

**2010-mi aningaasanut inatsisissatut siunnersuut**

**pillugu**

**Inatsisartut Aningaasaqarnermut Ataatsimiititaliaata**

**ILASSUTITUT ISUMALIUTISSIISSUTAANUT TAPILIUSSAQ**

**Inatsisissatut siunnersuutip pingajussaaneerpeqarnerani saqqummiunneqartoq**

Aningaasaqarnermut Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Naaja Nathanielsen (Inuit Ataqtigiit), siulittaasoq

Inatsisartunut ilaasortaq Niels Thomsen (Demokraatit), siulittaasup tullia

Inatsisartunut ilaasortaq Per Berthelsen (Siumut)

Inatsisartunut ilaasortaq Aqqaluaq Egede (Inuit Ataqtigiit)

Inatsisartunut ilaasortaq Finn Karlsen (Atassut)

## 1. Aallarniut

Ulloq 24. november 2009 Aningaasaqarnermut Ataatsimiititaliaq aningaasanut inatsisissatut siunnersuummut ilassutitut isumaliutissiissuteqarpoq.

Ulloq 25. november 2009-mi allannguutissatut siunnersuutinik allanik marlunnik Naalakkersuisut saqqummiussipput; nr. 295 aamma 296.

Tamatuma saniatigut Naalakkersuisut allannguutissatut siunnersuutimik nr. 286-ip tunuartinnissaa kissaatigaat.

Allannguutissatut siunnersuutit nr. 295 aamma 296 ilassutitut isumaliutissiissuummut tapiliussamut matumunnga ilanngussaq O-tut ilanngunneqarput.

## 2. Naalakkersuisut allannguutissatut siunnersuutaat nr. 295 aamma 296.

### Konto pingaarneq 80.00.00 Sanaartornermut atugassat agguanneqanngitsut

Aningaasaliissutit 2010-mi 7.750.000 kr.-inik ikilineqassasut 2011-imilu 7,75 mio. kr.-inik amerlineqassasut Naalakkersuisut siunnersuutigaat.

Allannguutissatut siunnersuut una allannguutissatut siunnersuummut nr. 296-imut atatillugu isigineqassaaq.

(Allannguutissatut siunnersuut nr. 295)

### Konto pingaarneq 86.60.01 Peqqinnissaqarfik

Suliassaq nummer 060.46.017-imi, Nuummi napparsimasunut akunnittarfimmut tunngasumi, aningaasaliissutit 2010-mi 7,75 mio. kr.-inik ikilineqassasut 2011-milu 7,75 mio. kr.-inik amerlineqassasut Naalakkersuisut siunnersuutigaat. Tamanna Naalakkersuisut malillugit ingerlatassatut pilersaarutigineqartunut sunniuteqartussaangitsutut nalilerneqarpoq.

Allannguutissatut siunnersuut una allannguutissatut siunnersuummut nr. 295-imut atatillugu isigineqassaaq.

(Allannguutissatut siunnersuut nr. 296)

Suliami matumani Aningaasaqarnermut Ataatsimiititaliaq ikinnerussuteqartunut amerlanerussuteqartunullu avippoq.

Allannguutissatut siunnersuutit nr. 295 aamma 296 **itigartinneqassasut** Aningaasaqarnermut Ataatsimiititaliami ikinnerussuteqartut, Siumup Atassutillu **inassutigaat**. Ikinnerussuteqartut ima tunngavilersuuteqarput:

Aningaasanut inatsisissatut siunnersuummut Aningaasaqarnermut Ataatsimiititaliaq ulloq 24. november 2009-mi ilassutitut isumaliutissiissuteqarpoq, taamaalillunilu ataatsimiititaliap aningaasanut inatsisissatut siunnersuummik suliarinninnera naammassivoq. Taama kingusitsigisukkut allannguutissatut siunnersuutinik pisariaqanngitsunik Naalakkersuisut saqqummiussinerat Aningaasaqarnermut Ataatsimiititaliamut aammalu Inatsisartunut Naalakkersuisut sulisitsisorisaannut ataqqinninnginnermik ersersitsineruvoq. Allannguutissatut siunnersuutinik suliaqarnissaminnut Naalakkersuisut qaammatinik arlalinnik piffissaqarsimapput aammalu allannguutissatut siunnersuutit taama kingusitsigisukkut saqqummiunneqarnerat

naammaginartumik tunngavilersorneqarsimanngilaq. Taamaattumik allannguutissatut siunnersuutit taakku missingersuutinik kusassaaniarnerinnartut ikinnerussuteqartunit paasineqarsinnaapput. Ingerlatsineranut sanaartormullu tunngasuni IST-mi angusat 0-inngortinneqarnissaat siunertariinnarlugu allannguutissatut siunnersuutit marluk saqqummiunneqarnerat ersarippoq. "0"-inngortitsinerli taanna piviusumik sumilluunniit tunngaveqanngilaq, tassa Dronning Ingridip Napparsimmavissuani napparsimasunut akunnittarfimmik sanaartornissamut aningaasaliissutinik 2010-mit 2011-mut nuussineq tamatumani tunngaviummat. Taamaalillunilu utaqquisutut allatsissimasut ikilisarneqarnissaannik pilersaaruteqarluni Peqqinnissaqarfimmi ingerlatat annertusitinneqarnerat tamatumalu peqatigisaanik napparsimasunut akunnittarfimmut aningaasaliissutit kinguartinneqarnerat allannguutissatut siunnersuutinut naapertuutinnngilluinnarpoq. Ajornartorsiutit taakku ersarilluinnartut nassuiaatigineqarnissaannut Naalakkersuisunut ilaasortap isumasioqatigiilluni ataatsimiinnissamut aggersarneqarnissaa ikinnerussuteqartunit siunnersuutigineqarpoq, Aningaasaqarnermulli Ataatsimiititaliami amerlanerussuteqartut tamanna kissaatiginngilaat, tamannalu ikinnerussuteqartunit assorsuaq ajuusaarnartutut aammalu Aningaasaqarnermut Ataatsimiititaliap inissisimaneranut sanilliullugu pimoorussinnnginnertut isigineqarluni.

Allannguutissatut siunnersuutit nr. 295 aamma 296 **akunerineqassasut** Aningaasaqarnermut Ataatsimiititaliami amerlanerussuteqartut, Inuit Ataqtigii Demokraatillu **inassutigaat**. Sanaartormut tunngasuni piviusorsiornerusumik missingersuusiortoqartarnissaanik Aningaasaqarnermut Ataatsimiititaliap arlaleriaqaluni kaammattuutigisartagaanut Naalakkersuisut allannguutissatut siunnersuutaat naapertuulluurtut amerlanerussuteqartut isumaqarput. 2010-mi aningaasaliissutit ikilisinnerat napparsimasunut akunnittarfimmik sanaartormut sunnuteqassanngitsoq Naalakkersuisut paasissutissiissutigimmassuk siunnersuutit ajornartorsiutissartaqanngitsutut amerlanerussuteqartunit isigineqarput.

### 3. Allannguutissatut siunnersuutip nr. 286-ip tunuartinnera

Allannguutissatut siunnersuut nr. 286 Naalakkersuisut namminneq tunuartippaat. Allannguutissatut siunnersuut taanna Aningaasaqarnermut Ataatsimiititaliamit isumaqatigineqartumik Kultureqarnermut Ilinniartitaanermullu Ataatsimiititaliap kissaateqarneratigut Naalakkersuisunit saqqummiunneqarpoq.

Aningaasanut inatsisissatut siunnersuutip pingajussaaneerneqarnissaanut Aningaasaqarnermut Ataatsimiititaliap 24. november 2009-mi ilassutitut isumaliutissiissutaani immikkoortoq 10-mi ima qulequtalerlugu allannguutissatut siunnersuut taasaqarfigineqarpoq; *Sammisag 22 - AUL-imut tapiissutit taakkulu aningaasalersornerat*. Allannguutissatut siunnersuut ilassutitut isumaliutissiissummi taaneqartumi ilanngussaq B-mut ilanngunneqarpoq.

Inatsisartut Suleriaasianni § 33, imm. 7-mi aalajangersagaq innersuussutigalugu allannguutissatut siunnersuut Aningaasaqarnermut Ataatsimiititaliamit matumuuna saqqummiunneqarpoq. Aalajangersakkami taaneqartumi allassimavoq allannguutissatut siunnersuut tunuartinneqartoq allanit, tassungalu ilanngullugu ataatsimiititaliamit imaluunniit ataatsimiititaliami amerlanerussuteqartunit ikinnerussuteqartunilluunniit saqqummiunneqarsinnaasoq.

Ataatsimiititaliap 24. november 2009-mi ilassutitut isumaliutissiissutaani takuneqarsinnaasutut allannguutissatut siunnersuut nr. 286 akuerineqassasoq ataatsimiititaliamit inassutigineqarpoq.

Ataatsimiititaliap inassuteqaataa allanngunngilaq.

#### 4. Allannguutissatut siunnersuutit aningaasatigut kingunerisaat

Allannguutissatut siunnersuummik nr. 286-imik Aningaasaqarnermut Ataatsimiititaliap saqqummiussinera IST-ip inernerisassaatur missingersuutigineqartunut Aningaasaqarnermut Ataatsimiititaliap pingajussaaneerinissamut ilassutitut isumaliutissiissutaani allassimasunut sunniuteqassanngilaq.

Naalackersuisut allannguutissatut siunnersuutaasa nr. 295-ip aamma 296-ip 2010-mi IST-mi angusat 7,75 mio. kr.-inik pitsanngoriartissavaat aammalu 2011-mi angusat taamatut ajorseriartissallugit.

Pingajussaaneerinissamut allannguutissatut siunnersuutit aningaasatigut kingunissaat takussutissiimi matuma kinguliani allassimapput

<b>AIS10-mi IST-p ineneri</b>	<b>AIS 2010</b>	<b>M 2011</b>	<b>M 2012</b>	<b>M 2013</b>
	(1000 kr.)	(Mio. kr.)	(Mio. kr.)	(Mio. kr.)
IST – Aningaasanut inatsisissatut siunnersuutaqaartoq	225.600.000	122,5	138,1	27,2
IST – aappassaaneerinermi allannguutissatut siunnersuutitigut allannguutit	28.905.000	35,2	35,2	35,2
IST aappassaaneerinermi	254.505.000	157,7	173,3	62,4
DAU – pingajussaaneerinermi Naalackersuisut allannguutissatut siunnersuutaasigut allannguutit	-35.355.000	-0,1	-34,3	-35,9
IST NUTAAQ, Naalackersuisut siunnersuutaat	219.150.000	157,6	139,0	26,5
IST NUTAAQ, Aningaasaqarnermut Ataatsimiititaliap siunnersuutai	227.000.000	163,1	144,5	32,0

Naalackersuisut allannguutissatut siunnersuutaat tamakkiisumik malinneqarpata Nunatta Karsia **2010-mi 219,15 mio. kr.-inik amigartooruteqassaaq.**

Aningaasaqarnermut Ataatsimiititaliap allannguutissatut siunnersuutai tamakkiisumik malinneqarpata Nunatta Karsia **2010-mi 227,0 mio. kr.-inik amigartooruteqassaaq.**

#### 5. 24. november 2009-mi ilassutitut isumaliutissiissummut naqqiut

2010-mi aningaasanut inatsisissatut siunnersuutit pingajussaaneernissaanut Aningaasaqarnermut Ataatsimiititaliap 24. november 2009-mi ilassutitut isumaliutissiissutaani Royal Arctic Bygdeservicep (RAB-ip) nunaqarfinnut angallatinik nutaanik pisinera immikkoortoq 2.5-ip ataani sammineqarpoq.

#### Tassani ima allassimavoq:

*Aningaasaqarnermulli Ataatsimiititaliamik ataatsimeeqateqarnermi Naalackersuisunut ilaasortap paasisutissiissutigaa atuisut toqqaannartumik akiluteqartinnerisigut nunaqarfinnut angallatinut nutaanut akiliinissaq naatsorsuutigineqarunnaartoq. Tamatumunnga taarsiullugu **Arctic Umiaq Linep***

*(AUL) Altantikoq ikaarlugu nunatsinnilu angallassinerani usinik assartuinnermut akigititat qaffannerisigut angallatit aningaasalersorneqarnissaat Naalakkersuisunut ilaasortap siunnersuutigaa. Tamatuma kingunerissavaa avannaani nunaqarfinni nioqutissat atortussallu akiisa qaffatsaaliorneqarnissaat siunertaralugu assersuutigalugu Narsami Nuummilu ilaatigut ulluinnarni nioqutissat sanaartornermullu atortussat akiinik qaffaanissaq.*

#### Eqqortumik ima allassimasussaavoq:

*Aningaasaqarnermulli Ataatsimiititaliamik ataatsimeeqateqarnermi Naalakkersuisunut ilaasortap paasisutissiissutigaa atuisut toqqaannartumik akiliuteqartinnerisigut nunaqarfinnut angallatinut nutaanut akiliinissaq naatsorsuutigineqarunnaartoq. Tamatumunnga taarsiullugu **Royal Arctic Line (RAL)** Altantikoq ikaarlugu nunatsinnilu angallassinerani usinik assartuinnermut akigititat qaffannerisigut angallatit aningaasalersorneqarnissaat Naalakkersuisunut ilaasortap siunnersuutigaa. Tamatuma kingunerissavaa avannaani nunaqarfinni nioqutissat atortussallu akiisa qaffatsaaliorneqarnissaat siunertaralugu assersuutigalugu Narsami Nuummilu ilaatigut ulluinnarni nioqutissat sanaartornermullu atortussat akiinik qaffaanissaq.*

Allannguutai ersarissunngorlugit allanneqarput.

#### **6. Inassuteqaatit**

Allannguutissatut siunnersuutitut aningaasanut inatsisissatut siunnersuummut ilassutitut isumaliutissiissummi ataatsimiititaliamit suliarineqartunut Aningaasaqarnermut Ataatsimiititaliap inassuteqaatai allannguuteqanngillat.

Allannguutissatut siunnersuutit nr. 295 aamma 296 **akuerineqassasut** Aningaasaqarnermut Ataatsimiititaliami amerlanerussuteqartut, Inuit Ataqtigiit Demokratillu ilaasortaataasa inassutigaat.

Allannguutissatut siunnersuutit nr. 295 aamma 296 itigartinneqassasoq Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataasa inassutigaat.

Allannguutissatut siunnersuutip nr. 286-ip **akuerineqarnissaanik** inassutini Aningaasaqarnermut Ataatsimiititaliap allanngortinngilaa.

Taama oqaaseqarluni Aningaasaqarnermut Ataatsimiititaliap allannguutissatut siunnersuutit siunnersuullu Inatsisartunut pingajussaaniigassanngortippai.

---

Naaja Nathanielsen,

---

Niels Thomsen

siulittaasoq

---

Per Berthelsen

---

Aqqaluaq Egede

---

Finn Karlsen